

---

## 'n Woord van AFRILEX

---

Dr. J.C.M.D. du Plessis het ons in die Voorwoord van verlede jaar se uitgawe van *Lexikos* meegedeel dat daardie volume die laaste een sou wees waarvoor hy as redakteur van ons tydskrif sou optree. Hy het aangekondig dat die redakteurskap in die toekoms op 'n roterende basis deur proff. Elsabé Taljard, Danie Prinsloo en Rufus Gouws behartig sal word. Ons verwelkom hulle, en veral vir Elsabé, wat bereid was om eerste aan die beurt te wees. Elsabé neem oor op 'n tydstip waarin *Lexikos* maksimaal funksioneer, en soos in die geval van 'n 4 x 100-afloswedloop, is hierdie taak ewe afhanklik van bekwaamheid as spoed. Johan, wat *Lexikos* vir nie minder nie as veertien uit die vorige twintig jaar geredigeer het, het van krag tot krag gegaan met elke nuwe uitgawe. Met volume 20 het ons uitmuntende redakteur 'n puik ampstermyn op 'n skitterende wyse afgesluit. Met 800 bladsye het Johan se finale uitgawe gegroei tot meer as net 'n nommer van 'n tydskrif om sodoende sy plek te verseker op die rakke vir die mees gewaardeerde boeke in 'n biblioteek, waar dit nou sy aan sy staan met die gewigtigste woordeboeke — heel gepas vir ons vakrigting.


Dit wat die kwantitatiewe prestasies betref. Kwalitatief was die opgang selfs meer indrukwekkend. *Lexikos* het in 2008 aangesluit by die wêreld se top linguistiektydskrifte, toe dit 56ste geplaas is uit 68 tydskrifte in die kategorie vir Linguistiek. Indien hierdie kategorie in vier kwartiele verdeel word, het *Lexikos* gemaklik tot die lys toegetree in die laaste (vierde) kwartiel. In 2009 het *Lexikos* se impakfaktor meer as verdubbel, van 0.300 (in 2008) tot 0.667 (in 2009), en was dit toe 49ste uit 92 tydskrifte, wat die tydskrif in die derde kwartiel geplaas het. Met verlede jaar se uitgawe het *Lexikos* hierdie uitstekende plasing behou, met 'n impakfaktor van 0.607 wat toegeken is. Interessant genoeg, in 'n lys tydskrifte in die kategorie vir Linguistiek, wat nou baie langer is en waar *Lexikos* tans 66ste geplaas is uit 141 tydskrifte, het ons tydskrif weer verbeter, aangesien *Lexikos* die tweede kwartiel in 2010 betree het — net een kwartiel weg van die toppunt.

In die *Journal Citation Reports* van Thomson Reuters kan bogenoemde grafies gesien word met 'n sogenaamde 'Box Plot' of houerstipping, soos aangedui op die volgende bladsy. Die horisontale lyn wat die houer sny, is die mediaan-impakfaktor vir die kategorie Linguistiek (A).<sup>1</sup> Hierdie mediaan is 0.562 vir 2010; dit wil sê met 'n impakfaktor van 0.607 vir *Lexikos* in 2010 het *Lexikos* inderdaad die tweede kwartiel betree, m.a.w. die bestek tussen die mediaan en

---

1 *Lexikos* behoort tot net een kategorie, Linguistiek, wat as A aangedui word op die grafiek. Party tydskrifte behoort tot meer as een kategorie, en hulle impakfaktor word dan voorgestel op meervoudige houerstippings (A, B, ens.).

die horisontale lyn wat die bokant van die houer vorm.<sup>2</sup> Om hierdie uitstekende prestasies te konsolideer is nou die uitdaging vir die volgende drie redakteurs in ons figuurlike afloswedloop. Dit is egter vir die snelle vordering tot hier waarvoor ons die dankbaarste behoort te wees.



Ek wil graag nog meer hulde bring aan Johan. Asof dit nie genoeg is dat hy die ekwivalent van ses maande van elke jaar gewy het aan die produksie van 'n *Lexikos*-uitgawe nie, met die gepaardgaande hantering van ongeveer 1 500 e-posse jaarliks,<sup>3</sup> het Johan, die akademikus, ook ontwikkel in Johan, die grootmoedige. Hy het alles in sy vermoë gedoen om 'n ware kultuur van wetenskaplike verslaggewing oor leksikografie in Afrika te help vestig. Buiten die sorgvuldige leiding wat hy aan nuwelinge gegee het deur hulle te help met talle herskrywings aan hulle bydraes, het Johan ook in 2003 die "*Lexikos* encouragement prize for scholarly writing" bekendgestel. Die doel van hierdie prys was in sy eie woorde:

Om studente in die leksikografie en jong leksikograwe aan te moedig om betekenisvolle navorsing op hul vakgebied te lewer, en standarde van wetenskaplike skryfwerk op die gebied van die leksikografie te verhoog. Mededinging om die prys geskied dus deur middel van 'n wetenskaplike artikel.

— J.C.M.D. du Plessis (2003, uit 'n insettel ingesluit by *Lexikos* 13)

- 
- 2 Die derde kwartiel is die bestek tussen die mediaan en die horisontale lyn wat die onderkant van die houer vorm, terwyl die vierde kwartiel die bestek onder die houer beslaan. Die eerste kwartiel is die bestek bo die houer.
  - 3 Dit is 'n konserwatiewe ekstrapolering gebaseer op slegs vyf e-posse met die outeur(s) van elke manuskrip, en vier e-posse elk met die twee beoordelaars van elke manuskrip. Daar word aanvaar dat die aanvaardingskoers ongeveer die helfte is.

Johan het nie net gepraat nie, maar ook die prysgeld vir die wenners beskikbaar gestel.

Ten slotte kan 'n mens met vrymoedigheid verklaar dat Johan nie alleen die aansien van *Lexikos* en daarom ook van AFRILEX verhoog het met sy onvoorwaardelike toewyding aan sy taak nie, maar ook van die leksikografie as 'n akademiese vakgebied as geheel. Ons betuig ons hartlikste dank aan dr. Johan du Plessis — 'n gewaardeerde kollega en 'n goeie vriend!

Gilles-Maurice de Schryver  
President: AFRILEX